



TEZAUR LITURGIC
9 IUNIE

**ACATISTUL
SF.CUVIOS
CHIRIL
DE LA
BELOEZERSK**



MOSCOVA, 2000



Акафист

святыму преподобному

Кириллу, игумену

Белоезерскому, чудотворцу

Кондак 1

Избранный от Царя сил Господа Иисуса, воине духовный и чудотворче предивный, преподобне Отче наш Кирилле, восхваляем Тя любовию в песнях духовных, святаго заступника нашего, ты же, яко имеяй благосердие многое, преклонися милостивне к нам воспевающим тя, и представительством твоим ко Господу, от всяких бед свободи зовущих ти радостно:

Радуйся, Кирилле, великий Чудотворче!

Икос 1

Ангел земный и человек небесный воистинну был еси, Отче преподобне, от утра жизни твоей до глубокаго вечера смертнаго, неленостно работавый Господеви в преподобии и святыни, нам же оставивый в пример подражания житие

твое равноангельное, ему же чудящееся, и чудесы твоими просвещаеми зовем Ти гласы хвалебными сице:

Радуйся, родителей благочестивых плод боголюбезный;

радуйся, первопрестольного града Москвы прозябение святое.

Радуйся, сиротствовавый в юности твоей;

радуйся, в сиротстве твоем Бога любовию усердною взыскавый.

Радуйся, в сыновство Божие свыше соприченный;

радуйся, вся богатства мира сего Христа ради презревый.

Радуйся, радости и утехи земные ни во что же вменивый;

радуйся, едино тщание имевый, еже единому Богу благоугождати.

Радуйся, чтением писаний божественных душу твою напитавый;

радуйся, слезами молитвенными сердце твое уплодоносивый.

Радуйся, чистоту душевную и телесную
непорочно сохранивый;

радуйся, постом и воздержанием страсти
юношеские обуздавый.

Радуйся, Кирилле, великий Чудотворче!

Кондак 2

Видев сродник твой, именитый болярин
Самодержца Российского, благонравие души
твоей, Отче преблаженне, возлюби тя и постави
строителем дома своего, да печешися о потребах
его, ты же молвами житейскими обуреваемый,
зело болезновал еси душею твою и тепле
молился еси ко Господу, да сподобит тя вне мира
и его сует, в безмолвии Ему служити и
невозбранно воспевати ангельскую песнь:
Аллиуия.

Икос 2

Разумом богопросвещенным позна
благоплодие души твоей преподобный Стефан,
игумен обители, иже на Махре, егда прииде во
град Москву и познася с тобою, Святче Божий,
емуже ты со слезами желание сердца твоего
исповедал еси, яко хощеши инок быти, и от него
обручение ангельского образа восприял еси.

Поминая убо таковую ревность твою к подвигом духовным, ублажаем тя, яко избранника Божия, и умиленно глаголем:

Радуйся, кроткий и незлобивый последователю Христов;

радуйся, заповеди Евангельские самым делом совершивый.

Радуйся, самоотвержение дивное по глаголу Господа твоего явивый;

радуйся, знатность рода и почести мирские, Христа ради оставивый.

Радуйся, вместо риз златотканых, рубища иноческая возлюбивый;

радуйся, крест Христов со усердием на рамо твое восприявый.

Радуйся, в души твоей добродетели высокия насадивый;

радуйся, всякое пристрастие суетное в себе искоренивый.

Радуйся, противу мира, плоти и диавола крепко вооруживыйся;

радуйся, силою Божию победивый вся их прилоги.

Радуйся, бывый сосуд непорочен Божия
благодати;

радуйся, соделавыйся страшен и неприступен
врагом невидимым.

Радуйся, Кирилле, великий Чудотворче!

Кондак 3

Силою Божией укрепленный, не убоялся еси,
преподобне, гневавшагося на тя сродника
твоего, иночествовати тебе возбранявшаго, но
от руки священнааго Феодора, архимандрита
Симонова монастыря, совершенное
пострижение во ангельский образ восприял еси,
и в стенах обители его тихое пристанище
спасения себе обрел еси, труды к трудом
прилагая, и в молитвах деннонощных сладце
воспевая спасителю Богу: Аллилуия.

Икос 3

Имея послушание от настоятеля, еже
трудитися в хлебне и поварне, Отче досточудне,
не дал еси сна очима твоима, ни веждом
дремания, но неленостно трудился еси, днем
дрова секий, огнь возжигаяй, хлебы и пищу
братии приготовляй, нощию же в молитвах,
псалмопенииих и коленопреклонениих бодренно

пребываяй, был еси добрый делатель Царствия Небеснаго, по степенем добродетелей восходивый к совершенству духовному. Темже восхваляем тя сице:

Радуйся, иноче Богоугодный,
иночествовавый нелицемерно от искренния
души;

радуйся, послушниче совершенный, слово
веления самим делом предваряvyй.

Радуйся, слезный искателю блаженства
вечнаго;

радуйся, молитвенный воздеятелю рук
преподобных горе ко Господу.

Радуйся, огнем пещным в хлебне и поварне,
огнь мучения вечнаго себе напоминавый;

радуйся, послушанием поваренным умиления
глубину стяжавый.

Радуйся, хлеб той слезами любве ко Господу
орошавый;

радуйся, питие твое плачем покаянным
растворяvyй.

Радуйся, прежде всех обретавыйся в храме
на службах Божественных;

радуйся, возлюбивый приметатися к дому
Бога твоего.

Радуйся, поста суровством умертвивый плоть
твою, да не возобладает она духом;

радуйся, чрез два и три дня пищу скудную
вкушавый.

Радуйся, Кирилле, великий Чудотворче!

Кондак 4

Буря страстей и тяжелоносныя искушений
волны, аще и приразишася к тебе в новоначалии
иначеском, угодниче Божий, обаче не
взмогоша поколебати крепость произволения
твоего, еже единому благоугождати Богу. Темже
молитвою, постом и послушанием истинным вся
стрелы вражия, на тя испущенный,
недейственны сотворил еси и сподобился еси
еще во плоти, в безстрастии глубоцем, возносити
Творцу Серафимскую песнь: Аллилуя.

Икос 4

Слышав о добродетельном житии твоем,
великий Сергий Радонежский, возлюби тя зело,
Отче Кирилле. И егда приходжаše от пустыни
своев в обитель Симонову, прежде всех
посещаше тя, суща в подвигах иначескаго

послушания, предпочтая тя юного старцем многолетним, и тем во удивление приводя всю братию, от егоже уст святых много словес душеполезных слышал еси, и слагая их в сердце твоем, был еси добрый ученик великаго учителя, воистину достойныи благохвалений таковых:

Радуйся, богоноснаго Сергия избранный друже и собеседниче;

радуйся, любовь велию о Господе к нему стяжавый, и от него зело возлюбленный.

Радуйся, во смирении твоем высокая дарования духовная получивый;

радуйся, уничиженно трудивыйся в подвигах послушания и тако Сергиева посещения сподобленный.

Радуйся, при послушаниях твоих никогдаже возроптавый;

радуйся, суд Божий и муки вечныя приснопамятовавый.

Радуйся, почестей суетных и славы человеческия избегавый;

радуйся, юродство Христа ради на ся восприявыи от всех унижен будеши.

Радуйся, от настоятеля наказуемый,
безчестие в почесть себе вменивый;

радуйся, худыя и многошвенные ризы
носивый.

Радуйся, зимним хладом тело твое угнетавый;

радуйся, покой телесный возненавидевый.

Радуйся, Кирилле, великий Чудотворче!

Кондак 5

Боготечное светило быв, на свещнице
священства поставился еси волею настоятеля
твоего, Отче Кирилле, и яко непорочный олтаря
Господня служитель, со страхом и благоговением
жертву безкровную приносил еси Богу, иже
содела тя тайнозрителем многих великих чудес,
в таинстве евхаристии сокрытых и являемых
священнослужителем достойным, к нимже и ты
сопричен был еси, зовый от любве теплыя
пострадавшему за нас Христу: Аллилуия.

Икос 5

Видевше тя братия в обители Симоновский,
богоносна и равноангельна житием, Кирилле
богоблаженне, избрава тя, аще и нехотяща, во
Архимандрита обители своея, ты же жезл

настоятельский прием, не превознесся еси толикаго сана высотою, но сугубо во смирении преуспевал еси и был еси образ преподобия словесному твоему стаду, словом и житием поучая твоя ученики, иже и взываху к тебе:

Радуйся, боговещанный учителю благочестия и чистоты;

радуйся, умиления преисполненный проповедниче покаяния.

Радуйся, егоже слова быва во спасение многим;

радуйся, егоже увещания умягчиша окаменелая во грехах сердца.

Радуйся, не словом токмо, но и всем житием, поучавый духовная твоя чада;

радуйся, чесому учил еси, та и сам творил еси неленостно.

Радуйся, князей богомудрый советниче;

радуйся, сильных мира сего нелицеприятный обличителю.

Радуйся, нищих и убогих любвеобильный кормителю;

радуйся, егоже любовь к меньшим о Христе
братиям никогдаже оскуде.

Радуйся, егоже благодеяниями насладишася
мнози;

радуйся, в немже прославляшеся на земли
Отец Небесный.

Радуйся, Кирилле, великий Чудотворче!

Кондак 6

Проповедник смирения истиннаго явился
еси, Отче, егда, стужив си славою и молвою
настоятельства в Симонове, оставил еси
настоятельство и удалился еси в безмолвие
келейное, да един единому Богу возможеши
работати невозбранно, обаче и в безмолвии не
остави тя враг спасения человеческаго,
вооружив на тя наставшаго по тебе настоятеля,
егоже гневу место уступая, преселился еси на
старое Симонове, и тамо уединенно пребывая,
немолчно воспевал еси песнь Богу: Аллилуия.

Икос 6

Возсия тебе свет небесный, егда в вечер
глубокий молился еси, преподобне, в келии твоей
пред иконою Богоматери, прося Ю даровать
тебе место удобное к безмолвному житию, и се

абие услышал еси глас от иконы Ея Святыя, сице глаголюц: «Кирилле, изыди отсюду и иди на Белоезеро: тамо бо уготовах ти место, на немже возможеши спастися», и с гласом вкупе, луча светозарная от полунощныя страны осия и указа место, свыше предъизбранное для твоего вселения, егоже радостно созерцал еси оконцем твоей келии. Тебе убо сице обрадованному, и мы радостно восклицаем:

Радуйся, великий угодниче Божий, еще на земли созерцавый свет небесный;

радуйся, избранный слugo Матери Господни, возлаголавшай к тебе от иконы Своей Святыя.

Радуйся, благоволением Владычицы мира облагодатствованный;

радуйся, прошения твоего исполнения от Нея приемый.

Радуйся, яко молитва твоя услышана бысть заступницею рода христианского;

радуйся, яко нощь просветися тебе сиянием Божественныя славы.

Радуйся, яко далече отстоящее место, близъ показася тебе судьбами Божиими дивными;

радуйся, яко свыше даровася тебе место
покоя духовнаго.

Радуйся, радости и утешения о сем
преисполненный;

радуйся, слезы теплыя благодарения и
хваления пред Богом изливавый.

Радуйся, молитв благовонное кадило;

радуйся, псалмопения органе изящный.

Радуйся, Кирилле, великий Чудотворче!

Кондак 7

Дивное видение и глас от иконы Богоматере
бывший, поведал еси, преподобне Отче,
спостнику твоему и другу, преподобному
Ферапонту[1], и с ним вкупе оставил еси град
отечествия твоего, и потекл еси в пустынью
непроходимую на Белоезеро, ища Богом
указанного ти места, еже обрет, зело
воздоровался еси, и на нем в пещере вселился
еси, во освящение же месту, честный Крест,
своима рукама соорудив, тамо поставил еси,
зовый распеншемуся на кресте и поправшему
силу адову, Царю славы Христу: Аллилуия.

Икос 7

Новым подвигом духовным вдал еси себе, богоблаженне Отче, в пустыни уединенно пребывая в молитвах, пощениих и трудах непрестанных, иже видя Всевидец Господь, собра к тебе паству иноков пустыннолюбивых, иже хотяху жити с тобою, и назидатися от тебе во спасение: и тако устроил еси обитель святую, яко крин в пустыни процветшую духовно, в нейже до днесь прославляется имя твое сими достодолжными похвалы:

Радуйся, преподобне, святостию и чистотою светло украшенный;

радуйся, богоносне, дарами Божественными свыше одаренный.

Радуйся, пастырю добрый тобою собранного стада словесных овец;

радуйся, строителю богоумдрый общижития иноческаго.

Радуйся, пустыню непроходимую в вертоград духовный трудами твоими претворивый;

радуйся, вся страхования и привидения вражия молитвами твоими посрамивый.

Радуйся, несомненною надеждою на Бога
обитель твою созидавый;

радуйся, слезами молитвенными основание
ея оросивый.

Радуйся, нищий духом, но многи богатящий;

радуйся, рукою Всевышняго державно
охраняемый.

Радуйся, от напрасныя смерти дивно
избавленный;

радуйся, от запаления огненного невидимо
защищенный.

Радуйся, Кирилле, великий Чудотворче!

Кондак 8

Странное видение бысть разбойником,
обитель твою ограбити умыслившим, Святче
Божий, иже пришедшe к ней нощию, видеша
ратных людей множество, на страже вокруг
обители стоящих, и ограбити ю непопускающих,
егдаже уведеша, яко некоторые стражи не
бысть во обители тоя нощи, познаша Божию тя
защищающую силу, и с раскаянием притекше к
тебе, исповедаху видение чудесное, о немже
радуяся, воспел еси со ученики твоими,

спасающему тя Богу, благодарственную песнь:
Аллиуия.

Икос 8

Весь в Боге быв, упование крепкое на Бога
вложил еси, Отче преподобне, яко силен есть
препитати тя со ученики твоими, в пустынном
месте пребывающими. Темже подаяния просити
ни к комуже посыпал еси, веря несомненно, яко
вся к житию потребная от руки Божия
получиши: и по вере твоей и молитве, от
боголюбцев вся сия и без прошения твоего
получал еси, удивляя чада твоя силою веры
творящие чудеса, и подвизая звати тебе:

Радуйся, безмолвия рачителю, молву суетную
возненавидевый;

радуйся, богомыслия высото, попечении
житетскими недосягаемая.

Радуйся, воздержания в пищи и питии
правило известное;

радуйся, нетрезвенного пития во обители
твоей имети возвранивый.

Радуйся, законоположения святых Отец
неизменно сохранивый;

радуйся, к подвигом высоким ученики твоя
руководивый.

Радуйся, достигни в меру совершенства о
Христе;

радуйся, приявый власть на духи нечистая.

Радуйся, чудотворения даром обогащенный;

радуйся, силою божественною
преисполненный.

Радуйся, прозорливость благодатную
проявивый;

радуйся, помощь целебную немздоприимно
подававый.

Радуйся, Кирилле, великий Чудотворче!

Кондак 9

Вси иноцы обители твоея, Преподобне Отче,
яко Ангела Божия тя почитаху, ибо воистинну
ангелоподобний нравы являл еси им в житии
твоем святом, иже все бысть посвящено
богоугождению непрестанному. Темже дивныя
чудеса творити дарова тебе Бог: недужныя
исцелял еси, бесноватая от мучения
диавольского свободжал еси, будущая прорицал
еси, еще же и самих мертвцев воскрешал еси

молитвою твою, во еже пети о тебе ближним и дальним, хвалебную песнь верховному чудес творцу Богу: Аллиуя.

Икос 9

Витийство человеческое не может изрещи величие чудес твоих, угодниче Божий, Отче Кирилле, имиже житие твое земное, яко цветами благовонными, духовно благоукрасися, облагоухая души верных сладостию преподобия и святыни, и приводя их к славословию Бога, сице прославльшаго тя своего избранника, нам же внушающаго взвывать к тебе:

Радуйся, болеющих добрый целебниче;

радуйся, разслабленных благосердый укрепителю.

Радуйся, слепым зрение многажды даровавый.

Радуйся, бесноватых от насилия диавольского освободивый.

Радуйся, болярина Романа от одра смертного здрава возставивый;

радуйся, умершаго инока Далмата на покаяние воскресивый.

Радуйся, оскудевшее во обители твоей вино
для Литургии святыя чудесно умноживый;

радуйся, во время глада опустевшую
житницу хлебом наполнивый.

Радуйся, оным хлебом гладныя люди
милостивно препитавый;

радуйся, яко хлеб той, тобою раздаваемый, в
житнице не оскудеваше, но паче умножашеся.

Радуйся, Кирилле, великий Чудотворче!

Кондак 10

Спасение вечное унаследовал еси, угодниче
Божий, и кончину праведную, яко венец
подвигом твоим, получил еси, неболезненно и
мирно прешед от земных к обителям небесным,
идеже святая твоя душа, воздаяние прия от
руки Вседержителя Бога, и со Ангельскими
воинствы предстоит престолу Его
Божественному, воспевая немолчную Ему песнь:
Аллиуия.

Икос 10

Царя Небеснаго рабе благий и верный,
данный тебе талант не сокрый, но
трудолюбно его усугубивый, и многу куплю

духовную им сотворивый, Отче Кирилле, помози и нам, земным и перстным, подражати житию твоему святыму, и стяжати при исходе нашем благую надежду спасения, да поем тебе умиленными гласы:

Радуйся, Святче Божий, свято и непорочно скончавый жизнь земную;

радуйся, Избранниче Христов, безболезненно и мирно предавый дух твой в руце Божии.

Радуйся, яко смерть твоя честна пред Господем, и успение со Святыми;

радуйся, яко память твоя с похвалами почитается во Святей Церкви.

Радуйся, яко преселився в небесныя обители, и земных не оставляеши;

радуйся, яко от горних высот благосердием твоим к земнородным проникаеши.

Радуйся, чудотворец бывый при жизни, таковым же явивыйся и по смерти;

радуйся, обитель твою и по скончании твоем сохранивый.

Радуйся, чада твоя духовная и по смерти твоей не забывый;

радуйся, во утешение им целебныя моцы твоя оставивый.

Радуйся, чтущим тя скорый предстателю;
радуйся, усердный всех прибегающих к тебе заступниче.

Радуйся, Кирилле, великий Чудотворче!

Кондак 11

Пение молебное приносится верными у раки святых мощей твоих, Кирилле богоносне, иже аще и в недрах земных почивают, обаче лучи многих чудес испущают, озаряя души и сердца ищущих с верою твоего заступления, егоже сподоби и нас, смиренных, сия песненныя хвалы тебе возносящих, и Богу благодарно зовущих: Аллилуия.

Икос 11

Светозарный светильник Божия благодати, озаряя полунощную страну Российского Царства, явился еси, преподобне и досточудне Отче Кирилле, духовным сиянием твоих подвигов и чудес просветивый пустыню, и в ней обитель иноком устроивый, идеже постников лики тихое пристанище спасения обретают, и

тя, первоначальника своего, любовию величающе, песненно тебе вопиют:

Радуйся, великоименитый и многославный в чудесах подвигниче;

радуйся, ангелонравный человече.

Радуйся, отечства твоего благодатное утешение;

радуйся, обители твоей присное радование.

Радуйся, мощами твоими преславно в ней чудодействуя;

радуйся, молитвы и прошения наша во благо исполняй.

Радуйся, смирение при жизни и по смерти возлюбивый;

радуйся, смиренно мощам твоим в недрах земных почивати восхотевый.

Радуйся, яко рака твоя честная врачебница явишя недугом человеческим;

радуйся, яко от нея всяк с верою приходяй дары целебный приемлет.

Радуйся, реко чудес приснотекущая;

радуйся, источниче исцелений никогдаже оскудевающий.

Радуйся, Кирилле, великий Чудотворче!

Кондак 12

Благодати Божия светлое жилище быв при жизни, Угодниче Божий, и по смерти твоей благодати причастну соделал еси раку мощей твоих, чудесы преславными уверяя нас, яко велик еси пред Господем, и яко много может молитва твоя пред благостию Его. Яви убо и нам, недостойным, щедроты твоя молитвенныя, и представительством твоим теплым окорми нас ко пристанищу спасения, да поем на земли живых, присно живыми и мертвыми обладающему Владыце Богу: Аллилуия.

Икос 12

Поюще многая и преславная чудеса твоя, преподобне Отче Кирилле, смиренно просим тя, небеснаго заступника нашего: в час грозный смертный, егда убогая душа наша к исходу своему приближится, покажи нам многомощное твое заступление, и избави нас представительством твоим от власти сил темных, обыкших преграждати душе человечестей восход в горния обители, ихже достигнути

сподоби нас молитвами твоими, да зовем тебе
благодарными гласы:

Радуйся, пресвятый единосущные Троицы
усердный служителю;

радуйся, Пресвятыя Владычицы Богородицы
достойный избранниче.

Радуйся, Ангельских сил светлый
собеседниче;

радуйся, Предтечи Господня
пустыннолюбивый подражателю.

Радуйся, Пророков Божиих прозорливый
подобниче;

радуйся, Апостолов Христовых единонравный
последователю.

Радуйся, мучеником добropобедным
сравнивыйся в подвигах терпением;

радуйся, Святителем богомудрым
соревновавый душеспасительным учением.

Радуйся, сияющая звездо в лице
Преподобных;

радуйся, блаженный сожителю Праведных и
всех Святых.

Радуйся, о немже радуются и Бога хвалят
человецы;

радуйся, егоже трепещут темные адския
силы.

Радуйся, Кирилле, великий Чудотворче!

Кондак 13

О, великий угодниче Божий и Чудотворче,
преподобне Отче Кирилле! Ты горе на небеси, мы
долу на земли, удаленний от тебе не толико
местом, колико грехами нашими: обаче дерзаем
приносити тебе сие малое похвальное пение, еже
милостивно приемши, умоли милосердаго
Творца, помиловать нас и избавити геенны
огненныя и мучений адских, да сподобимся
вкупе с тобою, в Царствии Небеснем, пети Ему
вечно радостную песнь: Аллиуия.

Этот кондак читается трижды, затем икос 1 и кондак 1.

Молитва

О, священная главо, преподобне и Богоносне
Отче Кирилле! Припадаем к тебе с верою и
любовию, и просим тя, небеснаго Заступника
нашего: яви велие милосердие твое нам,
смиренным и грешным, и пролей теплья

молитвы твои о нас ко Господу Богу. Свойственно есть тебе благосердие, святче Божий, ибо живущу ти на земли, едино бысть у тебе попечение, еже спасати от погибели греховны души человеческий, и вся твоя жизнь святая бысть зерцалом добрых дел, о нихже прославляющеся в тебе Отец Небесный, к Немуже велие дерзновение стяжав, испроси нам у благости Его: веру праву, благочестие нелицемерное, покаяние истинное, братолюбие совершенное и преуспеяние во всех благих делех. Исходатайствуй нам здравие душевное и телесное, земли плодоносие, воздуха благорастворение, мирное и безмятежное житие, непостыдную христианскую кончину и добрый ответ на страшнем Суде Христовом. Сохрани Церковь Святую и Державу Российскую от браней и нестроений. Огради обитель твою честную от всякаго зла, и вся правоверныя люди, к тебе приходящыя и мощем твоим покланяющиеся, осени небесным твоим благословением, и вся прошения их во благо исполни. Ей, Отче, не презри молитв наших, со умилением тебе возносимых, но буди о нас теплый представитель ко Господу, и сподоби нас помошю твою святою спасение вечное

получити, и Царствие Небесное унаследовати, да
славословим великия щедроты и неизреченныея
милости Отца и Сына и Святаго Духа, в Троице
покланяемаго Бога, и твоє Отеческое
заступление, во веки веков. Аминь.



ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

Нове
Небо